

दिनांक 26.06.2025

समय: 18.45 बजे

आकाशवाणी जयपुर—अजमेर

प्रादेशिक समाचार

- भारतीय अंतरिक्ष जातरी शुभांशु शुक्ला ने लेर गयो स्पेस एक्स ड्रैगन यान अंतरिक्ष ठेपन आई एस एस ऊं कामयाबीपूरण जुड़यो।
- मुख्यमंत्री भजनलाल शर्मा कयो—आपातकाल रो दौर भूलण रो नी, बल्कि संघर्ष री दास्तां रो प्रतीक—जोधपुर मांय लोकतंत्र सेनानी सन्मान जळसा मांय बोल रिया हा।
- सीबीईसी राज्य सरकार ने 6 हजार 315 करोड़ रिप्या रा पेट्रोलियम सर्विस टैक्स मुकदमा मांय राहत दी।
- प्रदेश मांय मॉनसून री गतिविधियां चाले —श्रीगंगानगर मांय सीजन री पैली तेज बिरखा व्ही।

भारतीय अंतरिक्ष यात्री गुप कैप्टन शुभांशु शुक्ला ने अंतरिक्ष मांय लेर गयो स्पेसएक्स ड्रैगन अंतरिक्षयान आज अंतर्राष्ट्रीय अंतरिक्ष स्टेशन—आईएसएस ऊं जुड़ गयो है। इण रे साथे ई 41 साल पछे अंतरिक्ष मांय भारत रो कोई अंतरिक्ष जातरी पूग्यो है। ओ ऐतिहासिक मिशन अमरीका, भारत, पोलैंड अर हंगरी रा चार अंतरिक्ष जातरियां ने अंतरराष्ट्रीय अंतरिक्ष केन्द्र मांय 14 दिनां रा वैज्ञानिक अभियान सारू ले गयो है। एक्सियम—फोर मिशन नी फगत एक वैज्ञानिक कामयाबी है, बल्कि वैश्विक प्रौद्योगिकी महाशक्ति रा रूप मांय भारत रा बधता कद रो ई प्रमाण है। विज्ञान अर प्रौद्योगिकी मंत्री डॉ. जितेन्द्र सिंह ई कामयाबी सारू एक्सियम—फोर मिशन टीम ने बधाई दी है। मिशन मांय भारत री महताऊ भूमिका रो जिकरो करता वणा कयो के इण रो दुनियाभर मांय भविष्य रा सगळा अभियानां माथे महताऊ असर पड़ेला।

मुख्यमंत्री भजनलाल शर्मा कयो है के आपातकाल रो दौर भूलण रो मुद्दो नी है, बल्कि संघर्ष री दास्तान रो प्रतीक है। आज जोधपुर रा मारवाड़ इंटरनेशनल सेंटर मांय आपातकाल री 50वीं वर्षगांठ रे मौके व्हीया लोकतंत्र सेनानी सन्मान जळसा मांय बोलता मुख्यमंत्री कयो के भाजपा सरकार जद कदे ई सेनानियां रा सन्मान रो मौको मिल्यो है, वे ई काम मांय आगे बधने जिम्मेदारी निभाती है। जोधपुर दौरा माथे गया मुख्यमंत्री इण ऊं पैला जोधपुर आईआईटी रा 11वां दीक्षांत जळसा मांय बोलता कयो के प्रधानमंत्री नरेन्द्र मोदी री अगुवाई मांय भारत, दुनिया री चौथा नंबर री अर्थव्यवस्था बण चुक्यो है। वणा कयो के लारला 11 बरसां मांय देश रा समर्पित भाव ऊं आधुनिक विकास कर्यो जा रियो है। मुख्यमंत्री कयो के जो पढेसर डिग्री हासिल करने निकळ्या है, वे काले भारत रो भविष्य लिखेला।

जळसा मांय मुख्यमंत्री पढेसरां ने न्यारा—न्यारा विषयां री डिग्री ई दी अर होषियार पढेसरा ने सोना रा तमगा बांट्या। कार्यक्रम मांय संसदीय कार्य मंत्री जोगाराम पटेल, उद्योग राज्यमंत्री के.के. विश्नोई अर वठे रा जननुमाइंदा समेत शिक्षक अर घणी तादाद मांय पढेसर मौजूद रिया।

000

आज अंतर्राष्ट्रीय नषामुक्ति दिवस मनायी ज्यो। ओ दिन मादक पदार्थां ने काम मांय लेवण अर वां री गैर—कानूनी तस्करी रे खिलाफ आयोजित करयो जावे। ई मौके नुवी दिल्ली रा डॉ. अंबेडकर अंतर्राष्ट्रीय केंद्र मांय कार्यक्रम राख्यो ज्यो। कार्यक्रम मांय सामाजिक न्याय अर अधिकारिता राज्य मंत्री बी.एल वर्मा कयो के अजे ताई देशभर मांय 14 करोड़ ऊं बत्ती लोग नशा मुक्त भारत अभियान

ऊं जुड़ चुक्या है। वणा कयो के 4 लाख ऊं बत्ती शैक्षणिक संस्थान ई ई अभियान मांय मदद कर रिया है।

अंतरराष्ट्रीय नशामुक्ति दिवस कार्यक्रम रो राज्य थर रो कार्यक्रम जयपुर रा इंदिरा गांधी पंचायतीराज संस्थान मांय राख्यी ज्यो। कार्यक्रम मांय सामाजिक न्याय अर अधिकारिता मंत्री अविनाश गहलोत कयो के समाज ने नशा मुक्त राखण री जिम्मेदारी सरकार अर संस्थावां री ई नी है, बल्कि समाज रा हर मिनख री ई है। वणा कयो के हर मिनख ने आरे-सारे रा लोगां मांय नशा मुक्ति रा बारा मांय जाग लावण अर नशा री गिरफ्त मांय जकड़ी ज्यो लोगां ने बारे निकालण रो संकल्प लेवणो व्हेला।

सामाजिक न्याय मंत्री बतायो के प्रदेश मांय ई साल बजट मांय श्रीगंगानगर, हनुमानगढ़, जैसलमेर अर बाड़मेर समेत 10 जिलां मांय 25-25 बिस्तर खमता रा नशामुक्ति केन्द्र सुरू करी ज्यो है।

ई बीचे, प्रदेश मांय नशामुक्त पखवाडा रे तैत आज ई न्यारा-न्यारा कार्यक्रमों री मार्फत लोगां ने जागरूक करी ज्यो। जैसलमेर मांय बीएसएफ कानी ऊं सरहदी गांव बाहला मांय कार्यक्रम व्हीयो। इण मांय बीएसएफ रा अहलकारां गांव वाळां ने नशा रा कुप्रभाव रा बारा मांय बताया। पाली मांय चिकित्सा महकमा अर जिला विधिक सेवा प्राधिकरण कानी ऊं बांगड अस्पताल मांय कार्यक्रम व्हीयो। कोटपूतली-बहरोड़ जिला मांय ई कार्यषाला राख्यी ज्यो अर रैली री मार्फत लोगां ने नशा रा नुकसान समझायी ज्यो। डीग मांय समाज कल्याण महकमा कानी ऊं कार्यक्रम व्हीयो। ई मौके नशा छोड़ चुक्या नौजवानां ने बधावो दीरी ज्यो। डीग रा समाज कल्याण अहलकार कुलदीप सिंह बतायो के अभियान ने भरपूर समर्थन मिल रियो है।

भरतपुर मांय बाल अधिकारिता महकमा कानी ऊं ई-साइकिल रैली निकाळी ज्यो। इण री मार्फत लोगां ने नशा रा दुष्प्रभाव री जाणकारी दिरायी ज्यो। श्रीगंगानगर मांय एनसीसी री 15वीं राज बटालियन कानी ऊं रैली निकाळी ज्यो।

राजस्थान सीआईडी इंटेलीजेंस मोटी कार्रवाई करता नुवी दिल्ली रा नौसेना भवन ऊं एक यूडीसी ने जासूसी रा आरोप मांय गिरफ्तार कर्या है। सीआईडी रा सुरक्षा महानिरीक्षक विष्णुकांत गुप्ता बतायो के हरियाणा रा रेवाड़ी रेहवासी आरोपी माथे पाकिस्तान री खुफिया एजेंसी ने सामरिक महत्व ऊं जुड़ी खबरां भेजण रो आरोप हो। आरोपी लिपिक नौसेना भवन मांय डायरेक्टरेट ऑफ डॉकयार्ड मांय तैनात हो अर सोशल मीडिया री मार्फत पाकिस्तानी खुफिया एजेंसी री महिला हैंडलर ऊं बरोबर सम्पर्क मांय हो। सुरूआती पूछताछ मांय सामी आयो है के इल्जामी ऑनलाइन गेम खेलण रो आदी हो अर उण री माली जरूरतां ने पूरी करण सारू वो महिला रा इषारा माथे काम कर रियो हो। आरोपी रा मोबाइल ऊं मिली जाणकारी मुजब उण ऑपरेशन सिंदूर रे दौरान ई गोपनीय सूचनावां महिला पाक हैंडलर ने मुहैया करायी ही।

केन्द्रीय कस्टम एक्साईज अर सेवाकर अपील अधिकरण-सीबीईसी राज्य रा पेट्रोलियम महकमा ने सर्विस टैक्स रा 6 हजार 315 करोड़ रिप्या रा मुकदमा मांय राहत देवता सी.जी.एस.टी. जोधपुर रा पैली रा फैसला ने नामंजूर कर दिया है। पेट्रोलियम अर खान महकमा रा सचिव टी. रविकान्त बतायो के महकमो ई मामला री तुरत पैरवी करता राज्य सरकार रो पगस राख्यो। वणा बतायो के केन्द्रीय अपील अधिकरण राज्य सरकार रा पगस ने मंजूर करता 20 जून ने काढी ज्यो मार्गदर्शिका मांय कयो के खनन अधिकार सहायक सेवावां नी है अर आं सेवावां ने नकारात्मक सूची रे तैत अंतर्गत छूट है। ध्यानजोग है के सी.जी.एस.टी. जोधपुर प्रदेश मांय खनिज तेल उत्खनन ऊं मिली रॉयल्टी ने अचल सम्पत्ति रा किराया रा रूप मांय मानता राज्य सरकार ने 01 अप्रैल 2013 ऊं 31 मार्च 2016 ताई रा बगत सारू साढे सोलह हजार करोड़ रिप्या ऊं बत्ती री पैनल्टी अर सर्विस टैक्स जमा करावण ने कयो हो, जिण माथे राज्य सरकार सीबीईसी मांय अपील दाखिल करी ही।

प्रदेश मांय साइबर धोखाधड़ी ऊं निपटण अर डिजिटल अपराधां माथे आंकष लगावण सारू सगळा पुलिस थाण मांय अबे साइबर हेल्प डेस्क थापित करी जाएला। राजस्थान पुलिस डिजिटलीकरण रा दौर मांय बधता साइबर खतरा ऊं निपटण सारू आ पहल करी है। पुलिस महानिरीक्षक शरद कविराज बतायो के लोगां री शिकायत अर सूचना सारू व्हाट्सएप हेल्पलाइन नंबर सेवा ई सरू करीजी है। वणा बतायो के **‘साइबर हेल्प डेस्क’** री मार्फत साइबर रोकड़ धोखाधड़ी, सोशल मीडिया ऊं जुड़्या अपराध समेत किंण ई साइबर समस्या माथे शिकायत दर्ज करी जा सकेला। इण रे अलावा किंण ई संदिग्ध मोबाइल नंबर ने ब्लॉक करावण मांय ई लोगां री मदद करी जाएला। सेवा रो उपयोग मोबाइल फोन री गुमषुदगी रह रपट दर्ज करावण मांय ई कर्यो जा सकेला।

प्रदेश मांय मॉनसून री गतिविधियां बण्योडी है। मॉनसून आज आगे बधता उत्तराद अर सरहदी जिलां ने ई तरबतर कर दिया है। श्रीगंगानगर जिला मांय आज ई सीजन री पैली तेज बिरखा व्ही। म्हारा खबरनवीस बतायो के जिला रा सादुलषहर अर सूरतगढ मांय व्ही जोरदार बिरखा ऊं निचला हलका मांय पाणी भरीज ग्यो।

मौसम महकमा मुजब आवता चौबीस घंटा मांय उदयपुर, अजमेर अर कोटा संभाग मांय ई कटे-ई-कटे भारी बिरखा होवण री आस है। महकमो आवता दो-तीन दिनां मांय जयपुर अर भरतपुर संभाग रा जिला मांय घणी भारी बिरखा री आस जतायी है। बीकानेर अर जोधपुर संभाग रे साथे आथूणी जिलां मांय काले ऊं बिरखा री गतिविधियां मांय बढवार री आस जतायी ज्यी है।

उत्तराखंड रा रुद्रप्रयाग आज संवारा राजस्थान रा सैलाणियां ने ले जाए री मिनी बस खाई मांय पड़ ग्यी। हादसा मांय तीन लोगां री मौत व्हे ग्यी अर आठ घायल व्हे ग्या। ई हादसा मांय नौ लोग अजे लापता बताया जावे। रुद्रप्रयाग रा पुलिस अधीक्षक अक्षय प्रल्हाद कोंडे बतायो के बस मांय कुल 20 लोग सवार हा, जिण मांय ऊं आठ लोगां ने बचा लीरी ज्यो है। ई बीचे, राज्यपाल हरिभाऊ बागडे अर मुख्यमंत्री भजनलाल शर्मा ई हादसा माथे गहरो दुःख जतायो है।

राज्य सरकार री वरिष्ठ नागरिक तीर्थयात्रा योजना रे तैत प्रदेश रा बुजुर्ग अबे अटारी बॉर्डर तांई ई घूम सकेला। देवस्थान मंत्री जोराराम कुमावत आ जाणकारी देवता बतायो के योजना मांय धार्मिक ठोड नी होवण रे बावजूद बाघा बॉर्डर ने जोडी ज्यो है।